



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tir\_yimyim

tir yimyim TAPAK 8

**Tanü PM Modi-i Bengal nung sen cr. 18,000 indang projects tenzüksütsü**

**Reece James-i Chelsea den küm trok contract tasen zülutepogo**



VOL. XXIII ISSUE NO. 150 (ADOK 150) DIMAPUR KÜPTOKNÜ (SATURDAY) METSÜREMI (MARCH) 14, 2026 ₹ 5.00

## NSWC-i Forensic laboratory tajung ka amenoktsü akhanger Nand Kishore Yadav-i Nagaland Governor inyaker

**Kohima, March 13, 2026 (TYO):** Nagaland nung tetsürtem dak tashiyim mapa inyakba ken o tem bushisüngdangtsü atema forensic laboratory tajung ka nüngdaker ta Nagaland State Commission for Women (NSCW) züngsem Kekhrienuo Meyase-i ashi.

Deputy Commissioner Office, Kohima nung Mahila Jan Sunwai sentong nung jembidang "tetsürtem dak tashiyim inyakba ken o teimba nung forensic kulitem nüngdaker" ta Meyase-i ashi.

Ajisüaka Nagaland nung forensic laboratory facilities tajung maliba ajanga samples tendangtsü atema tangaleniang bener yoker ta laisa ashi.

Tangaleni yokba ajanga report angutsüba nung mapang menur aser bushisüngdang nung tetsükdaktsü ajurur ta laisa ashi.

Nagaland nung forensic laboratory ka amenokba ajanga bushisüngdang maparen tajungba akümtsü aser mapang shitak nung temeten angutsü ta Meyase-ia metetdaktsü.

Tanü cyber harassment aser online abuse kanga bulur aser iba ajanga tetsürtem aser lanurtem dak kanga kongshir. Tanü asüng adokba cybercrime balala indang tayongzükbatem koktettsü atema awareness programmes agitsüla, safety mechanisms lateta ayutsüla aser ozüng mapa shitak akanga inyaksüla ta laisa ashi.

Mahila Jan Sunwai ya tetsürtemi pei tebilemtsütem benoktsü sabang ka ama lir aser iba ajanga bangdak

ketdangpurtem den indangindanga sensaksemteetsü ta Meyase-isa metetdaktsü.

Additional Deputy Commissioner, Kohima Headquarters, Ruopfukuotuo Noudi-i okilajembidang "judicial system nung ken o tem lemtetsüba nung tayongzükba ajurur" ta ashi.

Nagaland ya tetsürtem lendong nung jenbua aliba tesem ka ta züngshir saka tawa kibong nung tashiyim inyakba aser tanga ozüng alema inyakbatem kanga bulua ataloker. Anungji tetsürtem kümzüka ayutsü atema rejutem akangshitsü nüngdaker ta Noudi-isa ashi.

District administration-i department tem dang office aser rejutem nung Internal Complaints Committees (ICC) tentettsü shidi zülüogo. Iba ya tetsürtem kümzüka ayutsü atema government aser private establishments ajak nung tentettsüla ta paisa metetdaktsü. Sentong nungsa Sakhi One Stop Centre, Kohima Centre Administrator Vimenu Richa-ia centre ajanga tetsürtem nem teyari balala agütsüba indang osang lemsatep.

National Commission for Women-i International Women's Day 2026 tenüng nung Mahila Jan Sunwai ayongzüka state balala nung agir.

Tanü agiba sentong ya Nagaland State Commission for Women-i District Administration, Kohima District Legal Services Authority aser Department of Social Welfare, Kohima den yaritepa ayongzük.



March 13, 2026 nü Dr. Imkongliba Ao Hall, Lok Bhavan, Kohima nung Gauhati High Court nung Chief Justice, Justice Ashutosh Kumar-i Nagaland Governor Nand Kishore Yadav nem tezüngzüktep agidaktsüba noksa nung angur.

**Kohima, March 13, 2026 (TYO):** Hokolbamü Lok Bhavan nung Nand Kishore Yadav-i Nagaland nung 23 buba Governor inyaksü tezüngzüktep agiogo.

Justice Ashutosh Kumar-i Yadav nem tezüngzüktepa agidaktsü aser Chief Minister Neiphiu Rio o State Assembly Speaker Sharingain Longkumer na aden.

India Tir Droupadi Murmu-i March 5, 2026 nü Nagaland Governor inyaksü atema Yadav shima liasü. Pai Ajay Kumar Bhalla ket nungi Governor melenzüker. Manipur Governor Bhalla-i Nagaland nung Governor ama additional charge bena liasü.

Tanü Lok Bhawan nung agiba sentong nung State Cabinet züngsemtem, MLA tem, kin lennirtem, ketdangsurtem aser police o security forces ketdangsurtem aden.

Iba sentong agiba sülen Governor Yadav-i Chief Minister aser State Cabinet züngsemtem den ajurutepa sensaksema liasü.

"Takar aser temeyoktep aliba India linük nung Nagaland ya shilem ka lir. Nagaland ya

sobaliba senmang, lokti tangatetba tajung aser nübortemio akangakanga noktakba atema tetshir" ta Governor Yadav-i ashi.

"Naga nungger ya Nagaland atema dang masü saka linük ajunga atema konang lir" ta paisa ashi.

"Tanü India ya kanga junga melenshiba mapang ka lir. North Eastern region nung temulung kanga agütsür aser tawa connectivity, infrastructure aser economic development kanga junga kümogo" ta paisa ashi.

"Item maparen ajanga maongkatem agütsür aser linük renlokba otsü nung northeast sendakteper saka maittsü aser sobalibatem wazüka yutsür" ta Yadav-isa metetdaktsü.

"Nagaland nunga infrastructure, education, agriculture, tourism, digital connectivity aser entrepreneurship amala wadangtem kanga renloker. Item ajanga rongsenketzüng lenmang lapoker aser nübortem taküm jenjang tajungba akümer" ta Governor-isa ashi.

Nagaland nung sempet aketba lanurtem lir aser parnokki education, sports, arts, entrepreneurship aser public service dena wadang balala nung takoktem angur ta paisa shisem.

"Skills shitak sayuba, purapitetba aser rejutemi yariba ajanga item wadangtem ajanga mapa adokdaktsütsü aser lanurtem maongka agütsürtem akümtsü ajungmesotsü" ta Governor Yadav-isa ashi.

Governor Yadav-isa Constitution of India nung ajemdaker aotsü aser state sorkar o loktiliba nung nübor ajak den külemi inyaksü ta nangzük.

"Sorkar ketdangsubaren ajungtsü, ajak renloktsü aser nübor ajungtsü atema inyaksü. Ni Nagaland nung alirtem den yimjung akangshitsü, terenlok bener arutsü aser state sobaliba senmang wazüka ayutsü atema külemi inyaksü" ta paisa metetdaktsü.

Yadav-isa President Murmu aser Prime Minister Narendra Modi na dang pa nem iba mapa lemzüksüba atema pelaba metetdaktsü.

## NE nung Nagaland Sustainable Development Goals jenjang tajung yangluteta lir

**Dimapur, March 13, 2026 (TYO):** Sustainable Development Goal Coordination Centre (SDGCC), Planning & Transformation Department ajanga Nagaland SDG Action Awards 2025 aser State-Level Consultation on SDG India Index 4.0 and NER District SDG Index 2.0 sentong agiogo.

Iba sentong ya Capital Convention Centre Kohima nung agi aser Deputy Chief Minister, T. R. Zeliang-i tetushi süa jaoker ka ama shilem agia liasü.

Nagaland-i SDGs atongtsü atema kanga meranga inyaker aser North Eastern Region ajunga nungi top 10 districts nung Mokokchung, Kohima aser Dimapur densema liasü. Iba ya North Eastern Region SDG District Index 2023-24 nung lir

asoshi merangtsüla aser iba ajanga Viksit Nagaland 2047 mangdang atongtsü ta Zeliang-isa ayongzük.

Deputy CM T. R. Zeliang-isa tsünglanglen agüja alir nem Nagaland SDG Action Awards 2025 mementoos, certificates aser cash prize agütsü.

Sempet angurtem: Pinnacle Skill (Economic Sustainability), Good Samaritan Women Society (Social Development) aser MOBUST Team Nagaland, Youth Net (Environment Sustainability). "Nagaland sorkari Global Agenda 2030 aser Sustainable Development Goals (SDGs) den putepa inyaka arudar. SDG India Index 4.0 aser NER District SDG Index 2.0 atema State-Level consultations ajanga mapa inyaka aruba, tajungba akümtsüba aser 2030 nükla asoshi teinyaktsütem ajitetogo" ta

Development Commissioner, Minister C.L John aser MLA, Dr. Tseilhoutuo Rhutso na den administrative & departmental heads, SDG nodal officers, district 17 prong nungi deputy commissioner & teshimtet nübotem aden.

Deputy Chief Minister T. R. Zeliang-isa tanü Nagaland Civil Secretariat, Kohima nung Nagaland Institute of Transformation (NIoT) office building lapoktsüogo.

Nagaland Institute of Transformation (NIoT) amenokba ajanga Nagaland nung planning, policy innovation, aser development atema reju akangshir ta T.R. Zeliang-i ashi.

NIoT ya Nagaland sorkar atema think tank aser knowledge hub ka ama asütsü aser iba ajanga sorkar yaritsü ta paisa ashi.

Development Commissioner, Minister C.L John aser MLA, Dr. Tseilhoutuo Rhutso na den administrative & departmental heads, SDG nodal officers, district 17 prong nungi deputy commissioner & teshimtet nübotem aden.

Deputy Chief Minister T. R. Zeliang-isa tanü Nagaland Civil Secretariat, Kohima nung Nagaland Institute of Transformation (NIoT) office building lapoktsüogo.

Nagaland Institute of Transformation (NIoT) amenokba ajanga Nagaland nung planning, policy innovation, aser development atema reju akangshir ta T.R. Zeliang-i ashi.

NIoT ya Nagaland sorkar atema think tank aser knowledge hub ka ama asütsü aser iba ajanga sorkar yaritsü ta paisa ashi.

Development Commissioner, Minister C.L John aser MLA, Dr. Tseilhoutuo Rhutso na den administrative & departmental heads, SDG nodal officers, district 17 prong nungi deputy commissioner & teshimtet nübotem aden.

Deputy Chief Minister T. R. Zeliang-isa tanü Nagaland Civil Secretariat, Kohima nung Nagaland Institute of Transformation (NIoT) office building lapoktsüogo.

Nagaland Institute of Transformation (NIoT) amenokba ajanga Nagaland nung planning, policy innovation, aser development atema reju akangshir ta T.R. Zeliang-i ashi.

NIoT ya Nagaland sorkar atema think tank aser knowledge hub ka ama asütsü aser iba ajanga sorkar yaritsü ta paisa ashi.





March 13, 2026 nü Jammu nung Jammu & Kashmir Chief Minister Omar Abdullah, Deputy Chief Minister Surinder Kumar Choudhary aser tangartem Cabinet senden amendang tangokba noksa nung angur.

### Tanü PM Modi-i Bengal nung sen cr. 18,000 indang projects tenzüksütsü

**Kolkata, March 13 (Agencies):** Honibarnü Ato kilonser Narendra Modi-i West Bengal semdangtsü aser Kolkata nung aliba Brigade Parade Ground nung lokti senden ka nung o jembiba den külemi sen crore 18,680 indang terenlok project aika tenzüksütsü. West Bengal nung assembly election agitsü mapang ana nung lia February 28, 2026 nü SIR final electoral rolls sangdongba sülenbo tang mezüng pai Bengal semdangtsü. BJP-i Bengal state tesem ajaklen Parivartan Yatra campaign agia aruba sülen

Honibarnü tatembangbuba sentong nung Modi-i jembitsü. 2019 Lok Sabha election nung BJP-i Bengal nung jenjang junga angu saka 2021 küm Assembly election nung tamakok angu. BJP-i West Bengal nung Yatra campaign ya March 1 nü tenzüka sülen kilometer 10,000 jungnüa ayimjema iba sentong agia aruogo. Bengal nung SIR exercise agiba sülen voters lakh 63.66 shi tenüng züngdokogo aser ibaji voters shilem 8.3 shi lir. SIR ya yaküm November ita nung tenzüka liasü. Taruba hopta Election

Commission-i West Bengal nung assembly election agitsü atema anogotem sangdongtsü lia Modi-i Bengal semdangtsü; iba mapang nung pai gari lenmang, railways, rong anendak aser shipping sectors indang terenlok project aika tenzüksütsü. Railway sector nung Ato kilonser Narendra Modi-i Amrit Bharat Station Scheme kübok railway stations trok semzüksütsü. Modi-i tesüsabuba Kolkata nung aliba Brigade Parade Ground nung jembibaji 2021 küm assembly election jakdang jembiba liasü.

### Kumar CEC menden nungi agientsü atema MP 193-i notice agütsü

**New Delhi, Metsüremi/March 13 (Agencies):** Gyanesh Kumar Chief Election Commissioner (CEC) menden nungi agientsü atema Opposition MP temi Parliament House anaprongla nung notice agütsüogo, ta osang ka ajanga metetdaksü. Opposition MP 193 (Lok Sabha nung MP 130 aser Rajya Sabha nung MP 63)-i iba notice nungji sign süogo, ta kasa osang ajangasa metetdaksü. CEC Gyanesh Kumar anema benokba notice ji Trinamool Congress (TMC)-i Lok Sabha Secretariat nem-a agütsüogo. Iba notice nung sign süa alirtemji teimbaka opposition INDIA teloktep nung densema aliba party tem nungi MP tem lir. INDIA teloktep nung Aam Aadmi Party (AAP) bo densema mali, ajisüaka AAP-ia iba notice ji pusema sign süogo. Iba dak alia independent MP tem-a karibo iba notice nungji sign süogo. Tang mezüng Chief Election Commissioner ka menden nungi agientsü atema notice agütsü.

Opposition party temi onük tenet nung ajemdaker Gyanesh Kumar nem tai tongloktsüogo, aser item rongnung CEC-i party tem bendangshidanga züngshiba, tim masüba inyakba, election dak sendakba ochimashi bushisüngdangba nung tetsükdaksü agütsüba aser electoral roll nungi voters aika tenüng agienba densema lir. Opposition party temisa Bihar nung electoral roll merüktettsü atema agiba Special Intensive Revision (SIR) inyakyim aitsü. Iba mapatong kübok tim masüba nung voters tenüng aika agienogo, ta opposition-i aitsür. Opposition party temisa, CEC-i yimtenren party kar pusema party tem tsüngda bendangshidanga züngshir, ta aitsü. Opposition party temi, Kumar-i aiben ruling BJP yariogo, talisa tang SIR exercise tagidak mapang nung yariogo, aser ibaji Centre nung aliba sorkar party tajangzük ngudaksütsü nükjidong nung lir, ta metetdaksü.

### EC-i states/UTs pongu nung election agitsü anogotem sangdongtsü

**New Delhi, March 13 (Agencies):** Taruba hopta Election Commission-i states/UT pongu nung assembly election agitsü atema anogotem sangdongtsü. February 28 nü West Bengal nung final electoral roll sangdongba sülen tashishiba agütsütsü atema tatembangbuba anogoji March 15 lir, anungji iba anogo sülenbo Election Commission-i assembly election agitsü atema anogotem sangdongtsü. Election agitsü aliba states/UT - Assam, Tamil Nadu, Kerala aser Puducherry nungbo final electoral roll nung tenüng agiena alirtem asoshi tashishiba agütsü mapang tembangogo.

Osang angazükba agi, tan election nungbo shilem ishika dang lemsar election agitsü. 2021 küm nungbo West Bengal nung shilem 8 lemsar election agia liasü aser Assam nung shilem asem lemsar election agia liasü. Taoba mapang Tamil Nadu, Kerala aser Puducherry nungbo kenüyongi election agia liasü. Taruba assembly election shilem ishika dang lemsar agitsü, anungji central sepaitem tali lemzüksütsü, talisa West Bengal nungbo sepai aika lemzüksütsü. West Bengal aser Assam na nungbo shilem karbosa lemsar ang election agitsü, ajisüaka Tamil Nadu, Kerala aser

Puducherry nungbo kenüyongi election agitsü akok. West Bengal assembly kümsük taküm May 7 nü tembangtsü, anungji state nung April tatembanglen nungi May ita tetenzüklen tashi nung election agitsü akok. Brihostibarnü Election Commission-i West Bengal kübok constituency ajak (294) nung returning officers shimtsü atema osang metetdaksüogo. Election Commission-isa election agitsü aliba state tem nung Central sepaitem aser state police lemzüksüba mita reprangtsü atema Special police observers, police observers aser CAPF nodal officers shimtsü.



March 13, 2026 nü Haryana nung Panipat kübok Samalkha nung 'All India Representative Assembly of RSS' senden nung RSS tongti, Mohan Bhagwat aser RSS General Secretary, Dattatreya Hosabale na adenba noksa nung angur.

### Nisung kati taoba mapang J&K Chief Minister Abdullah khasettsü merang

**New Delhi, March 13 (Agencies):** Brihostibarnü Srinagar nung nisung kati National Conference party tongti aser Jammu & Kashmir nung taoba mapang chief minister, Farooq Abdullah khasettsü merang, ajisüaka security-i nokdangteta liasü. Abdullah aser J&K deputy Chief Minister Surinder Choudhary na kiyimba sentong ka nung adenba sülen meyipa aoba mapang nung nisung kati pa dak injang khaloktsü; idangyongjisa security sepaitemi nisungbaji nokdangteta liasü. Iba tatalokba nungji nisung shinga meyiru.

Farooq Abdullah'er jabaso aser tang Chief Minister teinyakdak, Omar Abdullah-i X ajanga, "Tsüngrem dak taochi lir. Kübu lendong nungi tera agi dang kümzük. Tang tashi nungbo osang tejangja memetet, ajisüaka nisung ka ket nungji pistol alibajibo tejangja. Tang tashi nungbo telangzüba dang nungi tasüngdangbatem teimba lir. Ajisüaka komaser taoba mapang Chief Minister nem lemzüksüba Z+ NSG anasai nisungbaji arutet? ta ni süngmanger," ta metetdaksü. Tang police-i nisungba dangji asüngdangyadar aser bushisüngdang tenzükogo.

**Indian National Congress**

March 13, 2026 nü New Delhi nung Congress Tir Mallikarjun Kharge, Lok Sabha nung opposition lenir Rahul Gandhi aser party MP KC Venugopal nung Congress Central Election Committee (CEC) senden nung adendang tangokba noksa nung angur.

**Bank of Baroda**

**PUBLIC DANG SANGDONGER**

Nüburtem dang ya sangdonger, Bank of Baroda, Circular Road, Dimapur, Nagaland-i tsünglanglen **Mr. K Kahuto Yepthomi** tenüng nung shia aliba kiojen ya **M/s. Michael Enterprise, Prop.- Mrs. Nzanbeni Humtsoe** nem credit/ loan facility atema security ama agizüktsü tebilemba lir. Tsünglanglen shia aliba kiojen madak kar danga temeden/kibur temeden lira anogo 10 tsüngda kuli bener Bank matsüngdangi arung ta tuyur. Anogo 10 tsüngda telangzüba kecha mengura iba kiojen dak sendakba nung tashishitsü kecha mali ama züngshitsü aser Bank-i mortgage maparen inyaksü.

**Kiojen osang tejangja:**  
 Block- 1, Thaheku Village, Dimapur, Nagaland nung Village Land Permit No.- TVC/530/22 nung aliba kimong tasazük **44,018 Sq.Ft.**  
**North tsütsülen:** Benjamin Yepthomi'er kimong, **East tsütsülen:** Aloto Zhimomi & Road, **South tsütsülen:** Nullah, **West tsütsülen:** Kihokhe Aye'er kimong.

**Sd/- (Trilochan Sahoo)**  
 Chief Manager  
 Mob- 9366501739  
 Date: 13-03-2026

**Sd/- (Haihangrang E H Newme)**  
 Empanelled Advocate  
 Mob- 9402237781



## TIR YIMYIM YIMOBILEM (EDITORIAL)

DIMAPUR

KÜPTOKNÜ

METSÜREMI 14, 2026

### Senbo endok, mapabo merenem!

**K**üm 20 nung sen crore 140 endok saka mapabo merenemtet aser ano mapaji renemtsü atema sen crore 267 nungdaker ta tebanga matsüşii tatar senden nung Nagaland chief minister-i Dimapur nung 2006 küm tenzükba Nagaland state stadium ta ajaba Multi Disciplinary Sports Complex (MDSC) merenemtetba indang osang ashibaji, ashiko, asenok asoshibo kecha balaka masütsüa akok saka 2006 küm asor lanurtem asoshibo tesüngmangtsüka asütsü. Ibaji Nagaland nung tebushir alitsü asü malitsüar memetet, saka lanurtemibo bushisüngdangnüa alitsüa akok. Nagaland nung asenoki kanga jangraba mapa ka lir, ibaji kiojen yangluba, construction, mapa ya lir, kechiyong kiojenji sen amshia yanglur aser asenoki jangrabaji mapabaji masü saka senotsü amshiner. Iba jagi government nung dang masü saka arogo nunga 'construction' mapa inyaksü dang jangrar. Aji oda, kiojen renemer nübortem nungdak atema amshitsübaji jangrar masü saka senotsü amshitsü jangrar asünungji, kiojen yangluba, construction, mapaji akok tashi kodanga merenemtsü meranger. Ashiko, ano India government-i tendanga Nagaland government nem Dimapur nung yanglutor aliba stadium-ji renemtsü atema nungdakba sen crore 267 ji agütsü nunga, ano küm ter lir külen senbo ajak endok saka stadium-ji merenemtet ano sen crore 499 nungdakba tebilemstüang bener arutsüa akok. Iba ama shisatsü aser asenoki Nagaland nung inyaksaba mapa ya bener Delhi-i otetba ya tasü tait mapa asü mesüra taaktsü maket mapa asütsü ta rataa bilemer. Atangji, tangar asoshibo sen crore 140 ji ishika dang asütsüa akok saka Nagaland asoshibo aji sen aika lir. Aji oda, nisung 3000 amentsüsa yanglutsüba stadium ka sen crore 140 agi Dimapur nung merenemtetbaji Nagaland government aser contractor asoshi dang masü saka alima tsüngdang Naga nunger ajak tamakok asütsü. Joko, Nagaland jungnüra asenok shisatsü, mindset, melenshitsuäba kaji, asenoki sen amshia kiojen yanglutsü jangratsü melen nübortem nungdak nung amshitsü atema yangluba kiojenji mapang shitak nung jungjunga renemer tajangzük lia amshidaktsütsü jangratsüla, kechiyong kiojen yanglubaji tatembang masü saka nübortem asoshibo tetenzüker dang lir. Aji oda, nübortem asoshi kiojen yangluba nungi asenokbo takar aküm saka kiojenbo merenem ta toktsüba senmangji pei chirnurtem asoshia tajung tazü senmang asütsü. Tangbo Naga nunger lanurtem tia ajung, Nagaland state stadium, MDSC, merenemteti alibaji renema amshitsü atema Sports Authority of India (SAI) nem agütsütsü jembidar ta asüba osangji asütsü. Ibaji asenok asoshi sen aika endokaka tashidak ajung amai, teimla osang tajung ka lir, kechiyong Nagaland state government dangbo SAI-i tajungba inyaksü aser stadium-ji renemer külena parnokisa tajungba anepalutsü. Asenok yabo tang tashi pei tenilak alema alima manguba nisungtem lir. Asenoki asen atema dang bilemer, iba jagi nübortem asoshi yangluba kiojenji renemtsütsü mebilemer. Asenok tejangraba aser tebilemba ajung agi, asen akatsü, asen achitsü aser asen alitsü ta asüba nung dang asenok jajar. Iba jagi asen kibo tajung saka asen lima majung, asen garibo tajung saka yimkong lenmangbo majung, asen süoshibo tajung saka asen yimdong nungbo auyi aponger aser lishi jaloker, asenbo takar saka government-bo sensaker. Iba shisatsüji dener yimsü asünung kodaser alima junga renloktsü? Iba shisatsüji dener contract mapa inyak nung kodaser mapang shitak nung mapa shitak renemtsütsü? Iba shisatsüji dener nüchiso bushi nung kodaser nüchiso angutsü? Iba shisatsüji dener sayu nung shibabo tajung akümtsü? Aser iba shisatsüji dener anepalu nung shibabo aneptsü? Joko, asenok ya sen amshia kiojen yangluba mapa inyaksü nung dang masü saka asenoki inyakba mapa agi asen nübor anisüngzükdaktsütsü aser asen lima topur jungdaktsütsü asoshia jangratsüla. Atangji, Nagaland nung arogo lenirtemi anir yimten yimsüsür aser bureaucrats, technocrats aser contractor ajaki Tsüngrem tsübüa aser nübortem meima mapa ajak shitak-shitak inyaklasang, nübortema jungla aser Nagaland-a jungla!

## OLEMSABANG

### Tanü putu nung lanur ka taküm senti mapang den pa/la taküm raksaba

Bendangnaro Jamir

(Iba Yimjangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Kum 18-35 tashi nung inyaktsusa adoker kechiyong kum 35 tema nungji asenoki inyaknua ka mesura Chinua ka machitsu, majemtsu, ali mapa inyaksu item ajak ya tashi agi dang inyakteter asunungji asenoki merang nunga bilemba ama asen tashi agi makoker. Item ajak ya lanur ka dak nungi tenzükba nubu tajung tashi ita aliba mapang aseni item mapa inyaka meinyakra asen tarutsu asen kisung takum atema dang masu saka tarutsu lanur asoshi jenjang raksatur ka dang asutsu. Nubu kaji lokti nung aten nungdang lokti ka kumteter aser nubu ka tamakok aser tesamaji lokti asoshi takoksa asur.

Tanur ka takum tim tazüba nung anitetba teakumji senti rongsen aika bendenba dang nungi taoba lir. Tanur ka takumji tarutsu nukla lir. Nisung ka takum agi khonang nungsang bener arutsubaji pa/la asoshi dang masu saka kin ka yimer ano pa/la sulen atur aoshi tangazukba tulu bener arutsur. Tang atalokba otsu odisha yim nungi lanur ka laji kum arishi 24 dang laya kanga yim tila ka nungi lir. Lar tsuraburji ka school nung soruchioker aser tebu ya taa agia inyaker ka dang liasu. Iba yimtak tetsur ka azung ashi metetbaji tebur ka ajemzükja yutsuba den saku ta medemdanger. Anungji la azungdang lar yimer, kinunger ajaki tsurbur tashi mezungmeshia liasu. Saka lar tsuraburi la jangraba nungji makamait asungunga kanga bendanga yari. La graduation sur kulen coaching-i aotsu sen maliasu, Saka YouTube nung angati lesson angazukba channel bushia la iba nungjaki azung aser la ya mezung lar yimtak nung odisha civil service nungi takok tulu angu aser tanu la ya alima ajaki metetba dang masu saka asenok Lanur asoshi tansütsu otsu ka lir, Aser tamaitu tulu sayur. Asenoki meranger dangbo ajak nung takok anguba dang masu saka tanur ka takum nung tsuraburji ka dang masu saka tesayur aser lenir tajung ka ta angateter.

Tanu putu nung tsurabur aika rongsen aser maparen arishidang kidang rongsen tulutiba samaba jenjang aseni ajurur . kunu tangar ka kidang aodang nisung aika temesepba chiyungtsu tatishitsu agi Sali, moko,peri yamala lemsatepa chia angu. Iba tesem nungji tanur tain ajak sentepa liasu saka parnoki ibaji chiyungtsu tajung ka amai lemsatepa chitep, saka iba ajanga tanur laji mesura paji yimya tamajung ka sayuba dang masu saka parnoki aibelen dang tanur dang koma tekongshi ta ashitsu itemla tarutsu indang kecha mebilemdangi asen tanur dang yimya tamajung sayuba ka angur. Aser iba ama chitenchiraba ajanga tanu putu nung cancer ama tashidak bulua adoktaktsur . Asenok meimchiri tajung angazuktsu tasak saka tamajung angazuktsubo mapang magi mela mela angazukteper. Item ajak tenzükba ya kibong nungi tim awashi aser libaliru maliba ajanga ta asenoki angateter. Tanu putu nung kanga sashia timtem asenok khristan lima nung atatlokbaji tim masuba tetsur o tetsur aser tebur o tebur na yimtepba ya lir. Iba maparen ya Tsungrem anemba maparen ka lir ta asenoki angateter kechiyong Tsungremi mezung alima yangludang tebur Adam aser tetsur Eva ta yanglur tena dang nungi jakzuka aotsu mezung nungi yanglu saka tanu iba ozung anema kasa tetsur aser kasa tebur aika liteper noksa(social media) yimya balala nung angur . Saka kari ashiba agi item timtem ya ki telong nung shibanger asen shisalemsa dak makai rongjena shisabulua alidang shiba asen dangi arua shisalemsa la/pa timtem angateta yariteper iba denji memeteti tatsuba leni aor ta ashir , ano karbo tetsur tebur azu talang ka mepilai kibalembua aliba ajanga adoker ta ashir , ano karbo kidang tsuraburi tetsur tebur mebendangi kanga meim amshiba mesura tain kuma tsurabur den supok ka sua aliba ajanga ta tatshitsu aika tetoktepba sapang balala nung tashitsu agi noksa balala(social media like facebook, Instagram, youtube etc) bener arur . A nungji item timtem ya joko temai jungkai adokerji asen tsurabur aser adianui tim tesayuba agutsua azuoktsu merangtsula ta asenoki angateter. Iba ama ya raratep mesura tetoktepba yimya balala agi makoktsu saka sayubentsu aser shisa agutsutep aguja dang azuoktetsu, otsula obula nunger mapang akhi mapang kibalembu kanga asungteteta aser tsurabur aser kin kidong kanga anakshia aser pa/la azu nung mata mabensar mesura chitemra Yamala achishimersa kibalembutep anungji akhi mapang nung sotetpocket mesura matamabensar ya nokalang nung ka mesura ana dang adoka liasu ta ashir saka tanu putu nungbo matamabensar bulua adokba dang masu saka tetsungteben ,shisatsu,yimyakoya Yamala amala nung tashi aika adoker asen kin dang masu saka tangar kin nunga adokba asenoki angur item timtemji tanu putu alima kanga ainba den chiyongtsu ajak nung mozu atenba aser tawang(radiation)yimaya balala nung tatishitsu agi phone nunger amala yamaji asenoki anogoshia amshiba oset tem ajanga asen kangshidaktsu.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## America nung lenirtemi Laishiba tetenzük nungi tatem tashi azüngtsü



"America Reads the Bible" nung America nung Khristan lenirtem, yimten lenirtem aser celebrities 400 dak temai shilem agia Lai azüngtsü. Shilem agitsüpurtem rongnung kar yangi noksa nung angur- Kathy Ireland, Patricia Heaton, Candace Bure, Kevin Sorbo, Colton Dixon aser John Cooper.

**March 12, 2026:** America küm 250 ajungba küm nung tesüiba kümtem nung inyaka aruba ama taküm-a Laishiba tetenzük nungi tatem tashi azüngtsü.

"America Reads the Bible" omen kübok Khristan lenirtem, yimten lenirtem aser celebrities 400 dak temai shilem agitsü. Parnoki anogo tenetnü tsüngda Lipok tapu ka nungi tenzuka Jungkai Adok tatem tashi azüngtsü.

Christians Engaged nung Tir aser 'America Reads the Bible' tenzüksang Bunni Pounds-i, "Onoki Tsüngrem O nung amanger, tongmelang agi Lai azüngba mesüra angaba ajanga temlungjang melenshitsür, kibongtem, lokti aser linüktem nung temelenshi adokdaksür," ta metetdaksü.

"America küm 250 ajungba mapang telongjem aser tamang tashi nungtem nung onoki Laishiba azüngtsü mesüra angatsü atema America nungertem ayongzüker," ta pai ashi.

Iba tetenzük sentongji April 18 aonung 7:00 ako nung agitsü aser iba sentongji Washington D.C nung aliba National Community Church nungi live sayutsü.

Minute 90 sentongji Great American Pure Flix nung sayutsü.

Tetenzük sentong tembangba sülen April 19 nungi April 25 tashi Museum of the Bible nung aliba World Stage Theatre nungi Laishiba azüng tenzüksü.

National ministries 100 aser linük nung Khristan lenirtem aser yimsüsürtem 475-i Laishiba tetenzük nungi tatem tashi azüngtsü.

Iba sentong nung adentsü jangrartemi Museum of the Bible-i arutsü akok mesüra AmericaReadsTheBible.com nung 'live' rebrangtsü akok.

Laishiba azüngba nung shilem agir yimten lenirtem rongnung Amb. Mike

Huckabee, Senator Ted Cruz (Texas), Senator James Lankford (Oklahoma), Senator Jim Banks (Indiana), Rep. Josh Brecheen (Oklahoma), Rep. Jodey Arrington (Texas), Governor Greg Abbott (Texas), Rep. Eric Burlison (Missouri), Rep. Michael Cloud (Texas), Governor Sarah Huckabee Sanders (Arkansas) aser Rep. Greg Steube (Florida) nung densema lir.

Iba dak alia Laishiba azüngba nung shilem agitsüpur Khristan lenirtem rongnung Dr. Ben Carson, Franklin Graham, Jonathan Cahn, A.R. Bernard,

Lisa Bevere, Ryan Bomberger, Michele Bachmann, William Federer, Dr. Ronnie Floyd, Dr. Jack Graham, Dr. Alveda King, Eric Metaxas, Rev. Samuel Rodriguez aser Nick Vujicic nung densema lir.

Kasa sentong nung shilem agitsüpur celebrities rongnung Chonda Pierce, Kathy Ireland, Patricia Heaton, Candice Cameron Bure, Jen Lilley, Kevin Sorbo, Colton Dixon, John Cooper, Danny Gokey, Kim Walker-Smith, Meredith Andrews, Leeland Mooring aser Jennie Lee Riddle nung densema lir.

## Khrista osang proktsü atema Arogotem longjemtsüla: Rick Warren

**March 13, 2026:** 2033 küm tashi nungbo alima nung meimchir ajak den Khrista osangtajung lemsateptsü nükjidong yua aliba atangji ataloktsü atema evangelical lenirtemi conference ayongzüka agiba mesüra yimiyim ayimoktsüba dang masü saka atangji nung longjemer inyaksüla, ta kaketzülur aser pastor, Rev. Rick Warren-i ashi.

March 12, 2026 nü World Evangelical Alliance (WEA)-i online ajanga ayongzüka sentong ka nung region balala nungi Arogo nung lenirtem den jembidang Rev. Rick Warren-i, Arogotemi longjemer meinyakra "2033 küm tashi nungbo ajak den osangtajung lemsateper alitsü" nükjidong atemzuka alibaji mataloktsü, ta metetdaksü.

"Ni kanga tsüba bilemba orenji '2033 küm tashi nungbo ajak den osangtajung lemsateptsü' ta asüba ya yimiyim ka dang asütsü. Asenoki ozülü ajungkettsü, teka amatsü aser iba atemaji ken atentsü, ajisüaka atangji nungbo wadang merenemtsü-a akok," ta pai ashi.

Yisu Khrista tasü nungi shia

aruba sülen küm 2,000 ajungbamongji 2033 küm amongtsü, aser iba küm tashi nungjibo meimchir ajak den Yisu Khrista osangtajung lemsateper alitsü WEA-i atemzuka lir.

Rick Warren-i, iba alizüngji tatem tashi anogo atema asadanga den kecha sendaktepa mali, ajisüaka külem nükjidong ka yur Arogotem aser mission organizations longjemer inyaksü atema lir, ta metetdaksü.

"Mapang atemzuka ayu nung ang asenoki mapa tekeraba inyakteter. Ibaji ajanga nükjidong ka agütsür," ta pai ashi.

Rick Warren-i, 2033 küm ya Khristan yimsü puti otsü nung kanga tongtibang küm ka asütsü; Yisu Khrista Kangki nung metaba, tasü nungi shia aruba, Yisui tenyaba wadang tuluba nungloktsüba aser Pentecost nung Arogo tentetba sülen küm 2,000 ajungba kümji 2033 küm lir, ta metetdaksü.

Paisa, "Arogo tenzükba sülen küm 2,000 ajungbamong nung asenoki Khrista nem agütsütsü sempet tulutibaji-yimya ka mesüra ka ajangabosa ajaki Khrista osangtajung angashir alitsü atema Arogoi

## ANOGO ABEN TSÜNGREM DEN

### Tema tazütsü agi Pa külembaji amajak

*Tsüngrembo tanela aser Pa külemertemi Tanela nung aser atangji nung külemtsü tim.*

- Yohan 4: 24.

Ibai deobar anepdang liasü, tanela kiji tekülemertem agi sünga alitsü ta bilem. Aji saka tekülem mapang tepiyong, tekülemdakji kecha ola mali asü. Kongki atem saka kentenba mali asü. Sayutsüngri sayutsüngi, saka pa tebangmechi nungi o katamadok. Choir ken tena aser teloki sarasadem, saka ola mangashi. Tila tanur ka ola dak alaka shinga ola mali asü. Pungmang ka asü? Atangji nung Tsüngrem Chir mulungjang nungi adokba ola dak alema asen tekülem tetezü makaba aser tarakzüba aser olung maliba ola kecha leni maor, bendanga magütsüba ola jagi Tsüngrem mulungjang ateta maor.

Yisui "Tsüngrembo Tanela" aser asenoki Pa "Tanela nung aser atangji" nung külemtsü tim ta ashiba tetezüji ibai lir. Asenok temang tobur junga sobubaji masü saka asenoki temulungjang taroktiba nungi Pa külemtsüla. Tekülem nung süoshi tobur tajung agir, tangar angutsü atema tashi agi ayimtena tema tazütsü agi ken tena sarasademba aser shilem balala agiba jagi Pa sentsü mewangshir aser Pai iba ama tekülemji magizüker. Saka bendanga agüja tanela agi Pa külemba ajanga dang Tsüngremji jungkai adokdaksür. Temulungjang taroktiba nungi asenoki Pa külemba aser tanela nung Pa den lungjema ajanga dang Tanela Temeshiji alur aser tekülem nung Pa den lungjemetter.

inyaker alitsüla," ta ashi.

Warren-i, iba nükjidongji meimchir ajak Khristan kümer alitsü atema masü saka ajaki maangka ngua Khrista osangtajung angashitsü atema lir, ta ashi.

"Nisungtemi kechi telangzüba agütsüdir ibaji asenok khuret masü saka Khrista osangtajung angashitsüsa ajak nem maangka agütsütsüji asenok teinyaksü mapa lir," ta pai ashi.

Osangtajung Yohan kakat nung Yisu Khristai tamangertem tsüngda telongjem atema sarasadem, anungji Arogotem, mission organizations aser ministry balala tsüngda longjemer amalitepa inyaksüji theological tamendakdak lir, ta pai ashi.

Warren-isa, Arogo atema telongjemji nüngdak, kulisürtem tashi itshidaksütsüla, tanela nung aintsü atema chiyungtsü agütsütsüla aser telung nung telemsa adokdaksüba nungi Arogotem kümzuka ayutsüla, ta ashi.

Yohan tapu 17 nung Yisui, alimai Khrista osangtajung amangtsüsa tamangertem longjema alitsüla ta ashi, ta paisa metetdaksü.

Khristan organization tsüngda longjemer inyaksü atema organization tsüngda networking, amalitep aser longjemer inyaksü nüngdak, ta pai ashi.

Conference balala nung kodang lenirtem adenshir shisa lemsatepdir, pei kidangi shilangdangbo tebilemba onük tajung aika bener aoer, aser ibaji networking lir, ta pai ashi.

Amalitep ya asalentong yanglur külemi inyakba lir; kodang nai tangar den külemi mener na aliba tesem tejangjaba metetdir ibaji ajanga amalitepa inyaksü bangjemer, ta pai ashi.

Pei kiyong dang ayimjemtsü atema masü saka yimti ajak aser region ajak ayimjemtsü atema kija sasep nung masü saka Arogotemi longjemer inyaksüla, ta pai ashi.

Longjemer inyakba tatishitsü ka lemsatepa Rev. Warren-i, Mexico kübok Tijuana yimti nung pastor tem ishika senden ka mena yimti nung aliba nütsüng ajak den Khrista osangtajung lemsateptsü atema o lemtepa liasü, aser tangbo iba nükjidongji ataloktsü atema yimti nung aliba Arogo noklang aika longjemer inyaker, ta metetdaksü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



Tir Yimyim

**Wainshin**

(adj) awashi temetet, tepera (etiquette)

\* Wainshin metetba nisung nem lokti anidaktsüsüla.

**Waitep**

(v) paitep (crossed each other)

\* Tsüingsangertemi sü tapu anatsülen waitepa jeblok.

**OLONG PAITEP # 7443**

|    |    |    |   |   |    |   |    |    |   |
|----|----|----|---|---|----|---|----|----|---|
|    | 1  |    |   | 2 |    | 3 |    | 4  |   |
|    | 5  |    |   |   |    |   |    |    | 6 |
|    |    |    |   |   |    |   |    |    |   |
|    |    |    | 7 |   |    |   |    |    |   |
| 8  |    | 9  |   |   |    |   | 10 |    |   |
|    |    | 11 |   |   |    |   |    |    |   |
| 12 |    |    |   |   |    |   | 13 | 14 |   |
|    |    |    |   |   | 15 |   |    |    |   |
|    |    |    |   |   |    |   |    |    |   |
|    |    |    |   |   | 17 |   |    |    |   |
|    |    |    |   |   |    |   |    |    |   |
|    | 18 |    |   |   |    |   |    |    |   |

**TIPIEN**

- 3. Miima agi
- 5. Tejangko
- 7. Aou teküp
- 8. Mako / Melemzük
- 10. Saklok / Aket
- 11. Ali nungzüka aluba
- 12. Talentsü
- 13. Ak ayudak
- 15. Ajunga
- 17. Meyong
- 18. O jembitsü tashi

**LANGTSÜNGLEN**

- 1. Asoshi
- 2. Tashidak lung
- 3. Bangsemo endok
- 4. Nütsüng züngdangba
- 6. Tsüngpret
- 7. Asüng sür külen
- 8. Hai-haura aka
- 9. Telongtet
- 10. T \_ \_ \_ \_ tiba
- 14. Tali / Onsara
- 15. Bilemdanger

**OLONG PAITEP # 7442 TELANGZÜBA**


**TIPIEN :**

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

**LANGTSÜNGLEN :**

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

**NAI-A YA METETTER MA**



Godrej Properties-i ghonda 1 majungdang influencers 1,000 tema anidena mapatong ka indang post asüba ajanga Guinness World Record ka yangluogo. Parnoki "highest number of people endorsing a brand on Instagram within one hour" otsü yanglu.

Instagram nung ghonda ka tsüngda parnoki brand ka pusemba reels, posts aser stories teimtiba post asü aser ajak nung "100,000 reasons to choose Godrej I vara" osang kasa dang sangdong.

**NCERT English textbook nung Temsula Ao aser Mitra Phukan dena lir**



**Guwahati, March 13, 2026**

**(Agencies):** National Council of Educational Research and Training (NCERT)-i adokba Class 9 English textbook tasenba nung Temsula Ao aser Mitra Phukan na dena Northeast nungi kaketzülurtem densema lir.

Iba textbook tasen dang "Kaveri" ta ajar aser Subramania Bharati, Sudha Murty, Temsula Ao, Mitra Phukan aser Rabindranath Tagore nungeri züluba otsütem keta lir.

School Education (NCF-SE) 2023 den putepa yanglu aser taoba Class 9 English textbooks "Beehive" aser "Moments" melenzüksü. Item textbooks ya 2006-07 nungi 2025-26 academic sessions tashi amshiogo.

Iba syllabus tasenba ya tiptemogo aser kaket ana nungi ka dang aküm aser texts 29 nungi 16 dang kümtsüogo ta ketdangsurtemi ashi.

Iba nungi Indian kaketzülurtemi 8 aser tanüngbaji bendanger kaketshir zülurtem indang lir. Parnokji American poet David Roth, English poet

Charles Swain, American children's writer Bryanna T Perkins, poet Robert Langley, writer Maya Anthony aser Singapore author Irene Chua nunger indang lir.

Iba textbook nung mezüngbuba otsüji 2004 küm Sudha Murty-i züluba "How I Taught My Grandmother to Read and Other Stories" lir.

Revised curriculum framework nung shilem ka ama iba kaket nung Indian Knowledge Systems (IKS) densema lir ta NCERT ketdangsurtemi ashi.

**Garo Hills district nung curfew tera salatsüogo**

**Shillong, March 13, 2026**

**(Agencies):** Meghalaya kübok district ana nung ketdangsurtemi March 13, 2026 nungi curfew salaogo aser iba ya nübertemi nüngdakattem alitsü atema lir.

West Garo Hills district nung anepdang 9:00 ako nungi anüngdang 1:00 tashi curfew salatsü. Külen East Garo Hills nung Deputy Commissioner RP Marak-i anepdang 8:00 ako

nungi nikongdang 5:00 tashi curfew salatsü.

Garo Hills Autonomous District Council (GHADC) nung election atema nomination maparen nung tribal aser non-tribal teloktem tsüngda raraba ajanga curfew ozüng agüja liasü.

Iba mepetmesü nung police-i injang khatokdang nisung ana asü aser Tura kübok tesem balala nung kiojen aika


raksaogo.

Iba tatalokba sülen tensa azüoktsü aser rara tuluba küma moudaktsüsü atema ketdangsurtemi Army mapa lemzüksüogo.

State sorkaria April 10 nü agitsü aliba GHADC elections thinenogo.

Timtem ajuruba tesemtem nung tensa süngjema aziüoka lir saka mejungi akümtsü ana nung lir ta ketdangsurtemi ashi.

**Assam CM Sarma-i Jorhat nung Swaraj Udyan lapoktsü**



**Guwahati, March 13, 2026**

**(Agencies):** Assam Chief Minister Himanta Biswa Sarma-i March 11, 2026 nü Jorhat nung Swaraj Udyan lapoktsüogo.

Swaraj Udyan ya Jorhat Central Jail anasa public park tuluka lir. Iba park ya 175 bighas nung Rs 159 crore endoka

yangluogo.

Northeastern state 8 nungi India independence movement nung shilem agirtem nem tetushi agüja iba park yanglu.

Iba park nung granite memorial pillars balaka yanglua lir aser item ajanga Northeast nungi nüjiso rarartemi shilem agiba tushir. Iba ya parnok

senmang wazüka ayutsü aser tarutsü pututem nem osang sangoktsüsü atema yanglu.

"Assam sorkaria putiotsü wazüka ayutsü, northeast nungi hero tem benjungtsü aser sensotem asoshi public tesemtem agütsüsü tenangzüka iba park ajanga sayur" ta Chief Minister Sarma-i ashi.

# Iraq nung US mitkar indang tayimtsü ka tsükok, nisung 4 asü

**Washington, Metsüremi/ March 13 (Agencies):** United States refueling aircraft ka Iraq anüolen tsükoka yangji mena aliba nisung trok rongnungi par pezü asü, ta United States Central Command (CENTCOM) ajanga ashi aser service member ana kumzüksü maparen tang teinyakdak lir.

"Iba lendong atalokba indang tensa bushistingdangba mapang lir," ta parnoki Hokulbarnü sangdong ka nung ashi. Ajisüaka KC-135 aircraft tsükokba ya tsükchir mesüra tembar temi akhaba ajanga masü aser iba lendong ya nikongdang 2:00 ako meta (Eastern Time) atalok, ta ashi. Service members tem kinunger nem osang agütsür ghonda 24 tashi parnok tenüng mesangdongtsü.

Iba lendong ya US-Israel nati Iran nung amakba mapang "friendly airspace" nung atalok, ta CENTCOM-i Brehostibarnü ashi. Sangdong nung iba tayimtsü tsükokba nungya tayimtsü ana densema ali ama ashir. Tayimtsü ka junga anentetogo, ta ashi. Ajisüaka Iraq nung aliba Islamic Resistance-i tayimtsü ka khazüka yokba tenüng agia parnoki Iraq anüolen tsütsü US Army KC-135 ka khazüka yok ta sangdong.

Washington, DC nungi osangbener kati ashiba agi, CENTCOM-i osang lemsatepba ya kanga mabensa

saka khazüka yokbabo masü ta ashir.

Iba tayimtsü metsükokdang iba military campaign nung service members tenet süogo ta US mitkari shia liasü, aser Kuwait nung nisung ti temang majung asü.

Service members 140 yiru, aser Pentagon odongtar Sean Parnell-i nisung ti kanga sashia yirua lir ta ashi.

February 28 nungi tenzüka Iran anema US mitkari rarayonga arudang Brehostibarnü lendong ya tesisaba alitsü.

Rara tenzüker anogo ka ajungdang 'friendly fire' nung fighter jets asem khazüka yoka lir.

Jets asem ya F-15E Strike Eagles lir aser active combat situation mapang Kuwait air defences-i aibelena khazüka yok, aser iba mapang Iran-i tayang kepzüka Middle East nung amaksü sangdonger liasü.

Iba lendong nung tayimtsü nung mena alir sepai trok ya takum mesamai kumzük.

Ajisüaka Iran anema raraba ya US nüburtemi maginer, aser polls agiba nung rara tetenzük nungi 'negative approval rating' mezüngbuba alitsü.

Quinnipiac University ajanga March 9 nü sayaba survey nung voters shilem 53-i Iran anema raraba maginer.

Iba dang nungi timba shilem 74-i ground operations tenzüksü memulunger, tetetzü

US sepaitem Iran nung tetsüng majemokdaksüner.

Iba mesü danga polls temia bushiteta liasü. Research firm Ipsos ajanga survey agiba nung America nung shilem 43-i Us strikes magizüker aser shilem 29-i agizüker.

Iran anema raraba tsütsü Tir Donald Trump bhukumer rongnunga telemsa adoka lir.

Talkshow host Tucker Carlson ama conservative nübu tejangja temi iba rara tebilemba mangateter.

ABC News den sensaksemba mapang Carlson-i iba rara ya tesempatsü aser temenen lir ta ashi.

Trump-i khenbo Iran den merara asübo "nuclear war" ka tenzükla ta ashi. Aser ano khenbo pai Iran den par nuclear sentong ajemtsü jembishinüba nung tajangzük mali ta ashi, ajisüaka ketdangsür temibo tezüngzüktep ka agitsü anasa lir ta aiben shia liasü.

Secretary of State Marco Rubio-i Israel-i Iran anema mera agitsü ta metetba ajanga US-i amak tenzüka ta, ta ita tetenzüklen shia liasü, saka mapang tatsüka lir pai iba o jembiba nungi pila ao.

US mitkar züngsem 11 asüba den Iran nung nisung 1,348 tepsetogo ta asadangteta lir aser Israel nung 15 tepsetba tejangja lir. Azüdokshi region ajunga nung prokshia otar aser anasa Gulf linüktem nung nisung 17 süogo.



Baghdad, March 12 : Baghdad nung March 12, 2026 nü Iraqi paramilitary Popular Mobilization Forces (PMF) züngsemtem asüpila sentong nung nüburtem adenba noksa nung angur. Syria den arütsü anasa Iraq indang Anbar province nung aliba Akashat nung Brehostibarnep tayimtsü amshia 19th Brigade headquarters amakba mapang PMF züngsem 32 tepset aser 65 yiru ta ashir.

# Pakistan-i tayimtsü amshia civilian tepset: Afghanistan

**Kabul, Metsüremi/March 13 (Agencies):** Pakistan-i yasüng tayimtsü amshia Kabul aser linük tesem balala amakba nung civilian trok tepset aser ter dak tema yirutsü, ta Hokulbarnü Afghanistan nung Taliban sorkari Pakistan dak tai tongloksü.

Pakistan-i civilian tem dak tenük yoker mamak ta ashir aser kidanger linük ana tsüngta rara tenzüker hopta tasembuba nung mejakloker.

Afghan sorkar indang odongtar Zabihullah Mujahid-i ashiba agi, Pakistan indang tayimtsü Afghanistan south tsütsü Kandahar nung aliba airport anasa private airline Kam Air meyong totzü ayuba tesem ka nunga amak. "Iba company yagi civilian airlines aser United Nations aircraft nem totzü agütsür," ta pai X nung ashi.

Tang operation tagidak aliba nung shilem ka ama Pakistan mitkari Afghanistan telung nung takok ngua tayimtsü amshia amak, ta Information Ministry nung telungpur atsükokdak tesem pezü aser parnok yariba ki o jen amak ta ashi. Pakistan-i civilian population alidak mamak, ta ministry ajanga ashi.

Hokulbarnü Pakistan northwest tsütsü Lakki Marwat district nung police gari ka dak tenük yoker lenmang tezülen bomb ka pokdaksüba nung police trok asü, ta police ketdangsür Sajjad Khan-i ashi. Shingaiia tenüng agia mali, saka Pakistani Taliban dak temulung

malemtsü amai lir, shirnok dang Tehrik-e-Taliban Pakistan ta ajar aser parnoki iba ama lendong agütsüba tenüng agir.

Linük ana tsüngta tensa kanga mejungi akumba mapang ka nung iba osang ya angashir, koba Pakistan-i "open war" ta jembir.

Pakistan-i amakba langzüa Kohat district nung Pakistani military installations nung amak aser takoksa tulu adokdaksü, ta Afghanistan indang Defense Ministry ajanga ashir.

Pakistan indang Ministry of Information ajanga ashiba agi, TTP ajanga Kohat nung rudimentary drones asem yok saka Pakistan sepaitemi itemji khazüka yok. Drones teraksa tsükba ajanga civilian ana yiru ta ashi.

Pakistan-i tayimtsü amshia Paktia aser Paktika province nung civilian tem aliba aser nisung maliba tesemtem amak, ta Mujahid-i ashi aser yamai amakba melangzüi metoktsütsü ta metetdaksü.

Kabul police odongtar Khalid Zadran-ia yimti nung tanurtem densema civilian pezü tepset aser 15 yiru ta ashir.

February ita tatemlen nungi Pakistan aser Afghanistan na kati ka indang military installations nung tenük yoktepa arur, koba Pakistan-i arütsülen amakba langzüa Pakistani posts amak ta Kabul-i ashir. Pakistan mitkari arütsülen TTP aser parnok yariba networks dak tenük yoker operation tenzüka ta ashir.

# Iranian warship nung asür sepai 84 tasü mang meyiptsütsü

**Colombo, Metsüremi/ March 13 (Agencies):** Taoba hopta Indian Ocean nung US submarine kati torpedo amshia amakdang Iranian sailors 84 tepsetba tasü mang Hokulbarnü linüki meyipa yoktsü, ta Sri Lanka indang defence ministry ajanga ashi.

Parnok ya Iranian warship Iris Dena nung mena aliba tzüyim sepai 130 rongnung dena liasü ta amanger, aser March 4 nü Sri Lanka south tsütsü tzükum nungi kilometer 40 shi pilar lia tzüyim telungi yok.

Tasü mang ya Galle National Hospital nung freezers ana nung ayuba sülen Iran-i yoktsü atema Hokulbarnü police escort kati Mattala Rajapaksa

International Airport-i belener ao.

Torpedo amshia amakba sülen par navy temi takum kumzükba sailors 32 ya Sri Lanka nung alitsü, ta Sri Lanka-i ashi.

Galle yimti nung aliba magistrate kati tasü mang ya Iranian embassy nem agütsütsü totuyuba agüja liasü.

Iba rong tzü telungi yoker mapang tatsüka lir US Defense Secretary Pete Hegseth-i Iranian warship ya süngjema süogo ta shia liasü.

Iran indang tzükum nungi miles 2,000 pilar tzüyim nung US-i mapa kangasa tamajung inyakogo aser iba yimya tamajung asoshi US-i khukhua

sasatsü, ta Iran indang Foreign Minister Abbas Araghchi-i ashi.

US Department of Defense ajanga iba sülen video ka prokshiba nung rong ka dak amakba ajanga rong tejaklen anüngleni tua apok.

Iris Dena ya India-i ayongba military exercise ka nung shilem agir meyipa aoba mapang amak.

Tang US-Israel nati Iran den raraba mapang international waters nung iba rong ya maka rara tuluba akum. Iba sülen Iran-i tayang kepzüka Middle East tesem ajunga nung US den tesendaktep tajung aliba Gulf linüktem nung tenük yoker maka arur.



Harare, March 13 : Nüburtem Harare, Zimbabwe nung station ka nung public transport vehicles anena aliba ajanga jaja aoba noksa nung angur. Middle East nung rara aliba mech crude oil jenjang tali akumba mapang Zimbabwe nungeri fuel pump nung timtemba jangjar. Totzü jenjang timba akumba ajanga public transport operators kari fares tali meshiba ajanga nüburtem ang tim atemer.

**HDFC BANK** Registered Office: HDFC Bank House, Senapati Bapat Marg, Lower Parel (West), Mumbai - 400 013 and having one of its office as Retail Portfolio Management at HDFC Bank Ltd, 1st Floor, I-Think Techno Campus, Kanjurmarg (East), Mumbai - 400042.

**SALE INTIMATION AND PUBLIC NOTICE FOR SALE OF SECURITIES PLEDGED TO HDFC BANK LTD.**

Tsünglanglen shia aliba HDFC Bank Ltd. (the "Bank") dang sen apur dang Loan/Overdraft Against Securities yimya nung credit facilities agiba atema Bank dang nangzüktepa aliba securities ayoktsü ta metetdaksü. Züngzüktepa aliba loan terms nung ama Borrowers-i tagütsütsü tim mapang shidak nung aiben magütsüba ajanga tsünglanglen agüja aliba accounts ya delinquent status nung lir. Bank ajanga item Borrowers dang tsünglanglen agüja aliba anogo nung final sale notice densema aiben osang agüja Bank-i nangzüktepa ama tsünglanglen agüja aliba accounts nung temonoktsü ajunga menoktsü asoshi Borrowers dang anogo 7 agütsü aser idangji memonoktetera, Bank-i iba dak sendakba nung tarutsü nung osang magütsü nangzüktepa aliba securities ayoktsü ta metetdaksü. Ajisüaka Borrowers-i senzuka yutsü aser temonoktsü memonok, anungji Bank-i loan agreement nung tashi agüja aliba amshia Borrowers-i Bank dang temonoktsü aliba menoktsü atema March 21, 2026 sülen Securities ayoktsü temektetba agiogo. Stock market tensa mejangja asünung pledged securities jenjang yagi margin requirement nung mepiritsüsa kumra, Bank-i iba dak sendakba nung osang magütsü calendar day ka (1) tsüngta pledged security ayoktsü. Pledged securities ayokba sülen Bank dang temonoktsü adokra, Borrower(s) ajanga menoktsüla.

| Sr. No. | Loan Account Number | Borrower's Name   | Outstanding Amount as on 10 <sup>th</sup> Mar. 2026 | Date of Sale Notice |
|---------|---------------------|-------------------|---|---------------------|
| 1       | XXXXXXXXXX5949      | L H THANGI MANNEN | 38,02,754.82  | 07-03-2026          |

DATE : 14.03.2026  
PLACE : NAGALAND  
Sd/  
HDFC BANK LTD

## Tanü Mithun-Rhino Pickleball Championship 2026 tenzüksü

**Dimapur, Metsüremi/March 13 (TYO):** Indian Pickleball Association (IPA) den affiliate süa aliba Nagaland Pickleball Association (NPA) ajanga saisapong puti otsü yanglushia March 14, 2026 nü mezüngbuba Mithun-Rhino Pickleball Championship 2026 ayongzüksü.

Iba championship ya Nagaland asoshi interstate pickleball tetoktepba tulu mezüngbuba alitsü, koba The Fitness House, Dimapur nung

anepdang 10:00 ako nung tenzüksü.

Iba sentong nung NPA tatong tir Kakivi Chishi menden asütsü, kong Sharingain Longkumer, Speaker, Nagaland Legislative Assembly tongti tesemdang aser Charlie Sekhose, Sr. Vice President, NPF tetushi tesemdang ama adentsü.

Dr. Husezo Rhakho, president, Asia Highland Partners ajanga sarasademtsü aser Nathan Kaurinta Zeliang,

tir, NPA ajanga pela agizükba o jembitsü.

Assam Pickleball Association indang secretary aser IPA indang Northeast Development Officer, Nazneen Rahman-i salem o jembitsü.

Iba asayamung ya March 15, 2026 nikongdang 5:00 ako nung tembangtsü.

Mithun-Rhino Pickleball Championship 2026 nung senpet sen ajak agi 2,00,000 den trophies aser kulizüing kaket tem agütsütsü.

## KDBA-i lanur nem badminton coaching agütsütsü

**Dimapur, Metsüremi/March 13 (TYO):** Kohima District Badminton Association ajanga badminton asayatsü tejangraba aliba lanurtem atema coaching sessions ka March 16 nungi tenzüka Indoor Badminton Stadium, Officer's Hill, Kohima nung ayongzüksü.

Training sessions ya Hombarnü nungi Honibarnü tashi nikongdang 3:00 ako nungi 5:00 ako tashi agütsütsü aser professional coach temi sayutsü.

District nung badminton asayatsü sempet aliba lanurtem nem professional training agüja anitetsü nükjidong nung iba camp ya ayongzüker.

Shilem agitsü jangra alirtemi Indoor Stadium, Kohima anasa Sports Inventory Centre aser New Secretariat Road nung Beits Plaza nung aliba Urban Bay Sports nungi registration forms meshitsü akok, ta sangdong ka ajanga ashi.

## Nagaland Olympic aser Paralympic games atema asayar shimtsü

**Dimapur, Metsüremi/March 13 (TYO):** Kohima, Chümoukedima aser Dimapur nung April 7-18, 2026 anogotem Nagaland Olympic and Paralympic games ayongzüksü aliba dak sendakba nung Tuensang district atema asayar shimba sentong ka March 14, 2026 anepdang 9:00 ako nungi tenzüka Parade Ground aser Loyem Memorial Ground Tuensang nung alitsü, ta Deputy Commissioner, Tuensang,

Lithrongla Tongpi Rutsa-i sangdong ka nung metetdaksüogo.

Individual Events nung 100m, 200m, 400m, 800m, 1500m, 5000m aser 10000m asemtepba, long jump, high jump, triple jump, shot put, discus throw, javelin throw aser cross country race alitsü.

Team Events nung 4x100 Relay, 4x400 Relay, 4x400 Mixed Relay aser Cross Country Race alitsü.

Cross country race atema team nung tajemba agi nisung pezü aser timba agi nisung trok alitsüla. Athlete shia individual events ana aser relay events ana kisüing nung shilem agidaksütsü saka cross country event nungbo tenokdangba mali, ta ashi.

Jangra aliba athletes temi agüja aliba tesemi anogo aser mapang shidak nung selection test atema arutsü ayongzüker, ta sangdong ajangasa ashi.

## Reece James-i Chelsea den küm trok contract tasen zülutepogo



**London, Metsüremi/March 13 (Agencies):** Chelsea captain Reece James-i küm trok atema tezüngzüktep tasen ka yangluogo, anungji pa Stamford Bridge nung 2032 tashi alitsü.

Arishi küm 26 tain James ya lanuwa nungi Chelsea nung liasü aser Blues atema September 2019 nung mezüing asaya liasü.

England nunger international sapang nung asayar Reece James ya Chelsea nung taa timtiba agütsür asayar ka lir, shiba nem hopta ka nung sen £250,000 agütsür.

James indang tezüngzüktep ya 2028 nung liwatsü liasü, anungji asendenshitsü asoshi

club teinyaksü tongtipangtiba akum. 2022 küm Todd Boehly aser Clearlake Capital ajanga agir mapang tatsüka lir pai contract nungya meyongnem agüja liasü.

Premier League nung tang season mapang Chelsea asoshi asaya 26 tashinung pai asaya lir aser item asaya nung 19 tetenzük nungi asaya aser club asoshi ajak senteper 225 ben asaya lir.

"Kü contract atsülangba asoshi ni kanga pelar - Chelsea ya kü atema kanga temoatsü lir. Ni kü tajungtiba mapang yangi liner ta teti shia aru," ta James-i club website nung ashi.

James-i Chelsea nungi

asaya 2021 küm Champions League akok aser kasa küm Uefa Super Cup akok aser 2025 Conference League aser Club World Cup aben aser küm asem tejakdang pa captain shima liasü.

Jembishinü kanga kera terenlok liasü südi ta amanger, kechiaser James ya yiruba ajanga seasons ishika nung timtema arur kanga kera taneptsü angu.

Hamstring (tepi tesülen) tanen makai yiruba aneptsü atema pa December 2023 nung surgery agia liasü.

Asayadak pa full-back aser midfield nung asayar.

Taoba head coach Enzo Maresca kübok küm tetenzüklen pa lenisüba nung tenüing asenba liasü saka tangbo melenshiogo ta angateter.

James-i England squad nungi 2026 World Cup nung asayatetsüsa maangka angutsüji tongtipang nükjidong ka lir ta shia liasü, shiba yiruba ajanga tesüiba asayamung ana nung shilem magitet.

International jenjang nung küm ana masayateti lir 2025 küm tetenzüklen Albania aser Latvia den qualification matches asayaba nung pa asaya liasü.

Pa yiruba ajanga October ita Wales aser Latvia den friendlies asayaba nung shilem magitet, saka November ita shilanga Wembley nung Serbia madak 2-0 agi takok anguba asaya nung pa shilem agia liasü.

## Satwiksairaj Rankireddy yiruba mechi Swiss Open quarter masayatsü



**Basel, Metsüremi/March 13 (Agencies):** India nunger badminton tarep asayar Satwiksairaj Rankireddy tapubang nung timtem aliba mechi Hokulbarnü Swiss Open quarterfinal asayatsü aliba nungi Rankireddy aser pa den külemi tarep asayar Chirag Shetty tena ainshio.

Super 300 badminton tournament indang last-eight stage nung Rankireddy aser Shetty na Denmark nungi Christian Faust Kjaer aser Rasmus Kjaer den asayatsü liasü.

"Ibai yiruba zübu tejen lir, aser pa yakta taneptsü angutsü imlar. Hopta ka shi agitsü," ta Malaysian coach Tan Kim Her-i ashi.

Iba zübu ya tasen masü saka tejen sütetshiba amai lir,

aser temaba jenjang nung asayartem asoshi iba timtem kanga bulua lir.

India nunger tarep asayar ana ya Brehostibarnü pre-quarterfinals nung minute 74 asayar Japan nunger Hiroki Okamura aser Kyohei Yamashita madak 21-15, 15-21, 28-26 agi takok ngua liasü.

Tebur tarep asayar World No. 4 Satwiksairaj Rankireddy aser Chirag Shetty nati Singapore nungi Eng Keat Wesley Koh aser Junsuke Kubo madak 21-19, 21-19 agi takok ngua round of 16 tonga liasü.

Asian Games champions Satwik aser Chirag na April 7 nungi 12 tashi Badminton Asia Championship nung tokteptsü lir. Tenati 2023 küm iba asayamung takok ngua lir.

## BILEMDANGANG

"Renema alirtem dangi tia tajungji arur."